

fica maximè distinguitur, cum causalitas causæ Physicæ in genere est verus ac realis influxus. Per realem autem influxum seu per rō realiter influere non indigitatur, ut nonnullis placet, quocumque modo alteri esse dare ac communicare, sed significat *immediate aliquid Entitatis vel Essentia numero à se diversum communicare*. Propterea rectissimè à Dn. D. Pet. Musæo asseritur, quod mediatus influxus, non sit influxus, cum de Essentia influxus sit, ut immediate fiat. Cum igitur dicitur causam moralem non revera influere, sensus hic est, quod ipsa in se immediate non communicet esse effectui, notanter dicitur *immediate*, alias enim non negari potest, quod ad effectum concurrat Causa Moralis mediate, nempe interventu Causæ Physicæ, ut v. gr. licet Incendiarius non immediate domum comburat, nihilominus tamen mediante igne tanquam causa physica ipsam facit combustionem. Proinde Causæ Morali qua talis realis influxus non competit, cum ut talis s. ut moralis physice in effectum influere nequit. Non autem omnis in genere ipsi repugnat influxus, sed saltem immediatus physicus ac realis, quantum enim in se est, conferre aliquid reputatur ad effectum in genere morum, & ita agit, propter quam actionem quoque ei imputatur effectus. Quo pacto à Causa physica etiam distinguitur, quæ reali influxu ad effectum concurrit, secus Moralis quæ influxu reali non gaudet, hinc optimè B. Slevoigt. Disp. 6. Acad. de Causa Morali §. 6. inquit: *Physica Causa quatenus talis reali influxu & per suam Entitatem jam existentem, ad effectum concurrat, sive sit naturalis sive supernaturalis, sive materialis s. spiritualis, nam omnium hac in parte eadem est ratio, & quaecumque Causa physice influere dicitur in effectum eam oportet, ut illum actione reali producat, idque per suam Entitatem non alienam quod si non facit, physica etiam vocari nequit. Moralis nec reali influxu ad effectum concurrat, nec eam producat per suammet Entitatem, sed per Entitatem Causæ Physicæ.* Rem declarabimus Exemplo. Medicus ægrotantis producit sanitatem non per suam, sed per medicamenti Entitatem & virtutem, & sic actione non propria & reali, sed rei alterius, propterea Medicus curationis & restauratæ sanitatis Causa Moralis est, illique adscribitur effectus, ac si physice causasset eundem. Ulterius quoque notamus quod

Causa